

15 JUN 1999

Pekerja-Memo

PEKERJA KAUM INDIA HANTAR MEMO KEPADA PERDANA MENTERI

KUALA LUMPUR, 15 Jun (Bernama) -- Sebanyak 36 pertubuhan bukan kerajaan yang mendakwa mewakili lebih daripada setengah juta pekerja kaum India di seluruh negara, hari ini menghantar memorandum kepada Perdana Menteri Datuk Seri Dr Mahathir Mohamad, mempertikaikan data kemajuan masyarakat itu dalam kajian separuh penggal Rancangan Malaysia ke-7.

Memorandum itu meminta kerajaan mengkaji semula data itu, yang disifatkannya tidak realistik dan boleh dipersoalkan.

Memorandum itu diterima bagi pihak Perdana Menteri oleh Mohd Shafiq Abdullah, pegawai pembantu tugas-tugas khas kepada perdana menteri.

Jurucakap kumpulan itu, K. Arumugam berkata kepada pemberita kajian oleh pelbagai kumpulan menunjukkan kebanyakan masyarakat India di Malaysia masih lagi dalam kategori kelas bekerja dan mempunyai pekerjaan yang bergaji rendah dalam kerajaan dan sektor swasta.

Bagaimanapun, kajian separuh penggal meletakkan pendapatan bulanan seisi rumah bagi masyarakat India di bandar dan luar bandar dalam tahun 1997 masing-masing pada RM3,289 dan RM2,019, dengan kadar pertumbuhan tahunan masing-masing 16.4 peratus dan 16.5 peratus antara 1996 dan 1997, yang tertinggi antara tiga kumpulan etnik yang terbesar, katanya.

Arumugam berkata ini menunjukkan pendapatan seisi rumah masyarakat India adalah tinggi berbanding Bumiputera sehingga tahun 1997, dengan kadar pertumbuhan tahunan masyarakat India pada 24 peratus, lebih tinggi berbanding Bumiputera di bandar dan 20 peratus lebih tinggi berbanding kaum Cina di bandar.

"Maklumat itu menunjukkan masyarakat India memperolehi lebih berbanding purata kebangsaan, bagi kesemua kumpulan etnik dan prestasinya juga baik sama ada di bandar atau luar bandar. Kami berpendapat maklumat itu tidak mencerminkan keadaan sebenar masyarakat India, dan kebanyakan masyarakat India masih lagi berada dalam kelas bekerja dengan upah rendah," katanya.

"Berasaskan analisis kami, kajian separuh penggal itu mesti disemak bagi menangani kemiskinan masyarakat India dan kaum minoriti lain, dalam program pembasmian kemiskinan dan penyusunan semula masyarakat," katanya.

Kumpulan itu juga meminta Perdana Menteri untuk menjelaskan laporan itu, dan menjelaskan kedudukan kerajaan dalam menangani keperluan masyarakat India dan kaum minoriti yang lain.

-- BERNAMA

YBK RI